

道生法。法者，引得失以繩，而明曲直者也。故執道者，生法而弗敢犯也，法立而弗敢廢也。故能自引以繩，然後見知天下而不惑矣。

虛無形，其寂冥冥，萬物之所從生。生有害，曰欲，曰不知足。生必動，動有害，曰不時，曰時而背。動有事，事有害，曰逆，曰不稱，不知所為用。事必有言，言有害，曰不信，曰不知畏人，曰自誣，曰虛誇，以不足為有餘。

故同出冥冥，或以死，或以生；或以敗，或以成。禍福同道，莫知其所從生。見知之道，唯虛無有；虛無有，秋毫成之，必有形名；形名立，則黑白之分已。故執道者之觀於天下也，無執也，無處也，無為也，無私也。是故天下有事，無不自為形聲號矣。形名已立，聲號已建，則無所逃跡匿正矣。

公者明，至明者有功。至正者靜，至靜者聖。無私者智，至智者為天下稽。稱以權衡，參以天當，天下有事，必有巧驗。事如直木，多如倉粟。斗石已具，尺寸已陳，則無所逃其神。故曰：度量已具，則治而制之矣。絕而復屬，亡而復存，孰知其神。死而復生，以禍為福，孰知其極。反索之無形，故知禍福之所從生。應化之道，平衡而止。輕重不稱，是謂失道。

天地有恒常，萬民有恒事，貴賤有恒位，畜臣有恒道，使民有恒度。天地之恒常，四時、晦明、生殺、柔剛。萬民之恒事，男農、女工。貴之恒位，賢不肖不相放。畜臣之恒道，任能毋過其所長。使民之恒度，去私而立公。變恒過度，以奇相禦。正奇有立，而名形弗去。凡事無小大，物自為舍。逆順死生，物自為名。名形已定，物自為正。

故唯執道者能上明於天之反，而中達君臣之半，密察於萬物之所終始，而弗為主。故能至素至精，浩彌無形，然後可以為天下正。

國失其次，則社稷大匡。奪而無予，國不遂亡。不盡天極，衰者復昌。誅禁不當，反受其殃。禁伐當罪當亡，必虛其國，兼之而勿擅，是謂天功。天地無私，四時不息。天地立，聖人故載。過極失當，天將降殃。人強勝天，慎避勿當。天反勝人，因與俱行。先屈後伸，必盡天極，而毋擅天功。

兼人之國，修其國郭，處其廊廟，聽其鐘鼓，利其資財，妻其子女，是謂重逆以荒，國危破亡。

故唯聖人能盡天極，能用天當。天地之道，不過三功。功成而不止，身危有殃。

故聖人之伐也，兼人之國，墮其城郭，焚其鐘鼓，布其資財，散其子女，裂其地土，以封賢者。是謂天功。功成不廢，後不逢殃。

毋陽竊，毋陰竊，毋土敝，毋故執，毋黨別。陽竊者天奪其光，陰竊者土地荒，土敝者天加之以兵，人執者流之四方，黨別者外內相攻。陽竊者疾，陰竊者飢；土敝者亡地，人執者失民，黨別者亂，此謂五逆。五逆皆成，亂天之經，逆地之綱，變故亂常，擅制更爽，心欲是行，身危有殃。是謂過極失當。

一年從其俗，二年用其德，三年而民有得。四年而發號令，五年而以刑正，六年而民畏敬，七年而可以正。一年從其俗，則知民則。二年用其德，則民力。三年無賦斂，則民不倖。六年民畏敬，則知刑罰。七年而可以正，則勝強敵。

俗者，順民心也。德者，愛勉之也。有得者，發禁弛關市之正也。號令者，連為什伍，選練賢不肖有別也。以刑正者，罪殺不赦也。畏敬者，民不犯刑罰也。可以正者，民死節也。

若號令發，必廢而上九，壹道同心，上下不□，民無它志，然後可以守戰矣。號令發必行，俗也。男女勸勉，愛也。動之靜之，民無不聽，時也。受賞無德，受罪無怨，當也。貴賤有別，賢不肖衰也。衣備不相逾，貴賤等也。國無盜賊，詐偽不生，民無邪心，衣食足而刑罰必也。以有餘守，不可拔也；以不足攻，反自伐也。

天有死生之時，國有死生之正。因天之生也以養生，謂之文；因天之殺也以伐死，謂之武：文武并行，則天下從矣。

人之本在地，地之本在宜，宜之生在時，時之用在民，民之用在力，力之用在節。知地宜，須時而樹，節民力以使，則財生，賦斂有度則民富，民富則有俾，有俾則號令成俗而刑伐不犯，號令成俗而刑伐不犯則守固戰勝之道也。

法度者，正之至也。而以法度治者，不可亂也。而生法度者，不可亂也。精公無私而賞罰信，所以治也。

省苛事，節賦斂，毋奪民時，治之安。無父之行，不得子之用；無母之德，不能盡民之力。父母之行備，則天地之德也。三者備，則事得矣。能收天下豪傑驍雄，則守禦之備具矣。審於行文武之道，則天下賓矣。號令合於民心，則民聽令；兼愛無私，則民親上。

經法·六分

觀國者觀主，觀家者觀父。能為國則能為主，能為家則能為父。凡觀國，有六逆：其子父，其臣主，雖強大不王。其謀臣在外位者，其國不安，其主不悟，則社稷殘。其主失位則國無本，臣不失處則下有根，國憂而存；主失位則國荒，臣失處則令不行，此之謂頽國。主暴則生殺不當，臣亂則賢不肖并立，此謂危國。主兩則失其明，男女爭威，國有亂兵，此謂亡國。

嫡子父，命曰上怫，群臣離志；大臣主，命曰雍塞：在強國削，在中國破，在小國亡。主失位，臣不失處，命曰外根，將與禍鄰：在強國憂，在中國危，在小國削；主失位，臣失處，命曰無本，上下無根，國將大損：在強破，在中國亡，在小國滅。主暴臣亂，命曰大荒，外戎內戎，天將降殃：國無大小，有者滅亡。主兩，男女分威，命曰大麋，國中有師：在強國破，在中國亡，在小國滅。

凡觀國，有六順：主不失其位則國有本，臣失其處則下無根，國憂而存。主惠臣忠者，其國安。主主臣臣，上下不□者，其國強。主執度，臣循理者，其國霸昌。主得位臣輻屬者王。

六順六逆乃存亡興壞之分也。主上執六分以生殺，以賞罰，以必伐。天下太平，正以明德，參之於天地，而兼覆載而無私也，故王天下。

王天下者之道，有天焉，有地焉，有人焉，三者參用之，然後而有天下矣。為人主，南面而立。臣肅敬，不敢蔽其主。下比順，不敢蔽其上。萬民和輯而樂為其主上用，地廣人眾兵強，天下無敵。

文德究於輕細，武刃於當罪，王之本也。然而不知王術，不王天下。知王術者，驅騁馳獵而不禽荒，飲食喜樂而不湏康，玩好嫖好而不惑心，俱與天下用兵，費少而有功，戰勝而令行。故福生於內，則國富而民昌。聖人其留，天下其與。不知王術者，驅騁馳獵則禽荒，飲食喜樂而湏康，玩好嫖好則惑心，俱與天下用兵，費多而無功，戰勝而令不行。故福失於內，財去而倉廩空虛，與天相逆，則國貧而民荒。至聖之人弗留，天下弗與。如此而又不能重士而師有道，則國人之國矣。

王天下者有玄德，有玄德獨知王術，故而天下而天下莫知其所以。王天下者，輕縣國而重士，故國重而身安；賤財而貴有知，故功德而財生；賤身而貴有道，故身貴而令行。故王天下者，天下則之。霸王積甲士而征不備，誅禁當罪而不私其利，故令天下而莫敢不聽。自此以下，兵戰力爭，危亡無日，而莫知其所從來。夫言霸王，其無私也，唯王者能兼覆載天下，物曲成焉。

君臣易位謂之逆，賢不肖并立謂之亂，動靜不時謂之逆，生殺不當謂之暴。逆則失本，亂則失職，逆則失天，暴則失人。失本則損，失職則侵，失天則飢，失人則疾。周遷動作，天為之稽。天道不遠，入與處，出與反。

君臣當位謂之靜，賢不肖當位謂之正，動靜參於天地謂之文，誅禁時當謂之武。靜則安，正則治，文則明，武則強。安則得本，治則得人，明則得天，強則威行。參於天地，合於民心。文武并立，命之曰上同。

審知四度，可以定天下，可安一國。順治其內，逆用於外，功成而傷。逆治其內，順用於外，功成而亡。內外皆逆，是謂重殃，身危為戮，國危破亡。內外皆順，功成而不廢，後不逢殃。

聲華實寡者，庸也。順者，動也。正者，事之根也。執道循理，必從本始，順為經紀。禁伐當罪，必中天理。背約則窘，達刑則傷。背逆合當，為若有事，雖無成功，亦無天殃。

毋止生以死，毋禦死以生，毋為虛聲。聲溢於實，是謂滅名。極陽以殺，極陰以生，是謂逆陰陽之命。極陽殺於外，極陰生於內。已逆陰陽，又逆其位，大則國亡，小則身受其殃。故因陽伐死，因陰建生。當者有數，極而反，盛而衰：天地之道也，人之理也。逆順同道而異理，審知逆順，是謂道紀。以強下弱，何國不克；以貴下賤，何人不得；以賢下不肖，何事不治。

規之內曰圓，矩之內曰方，懸之下曰正，水之上曰平；尺寸之度曰大小短長，權衡之稱曰輕重不爽，斗石之量曰少多有數，繩墨之立曰曲直有度。八度者，用之稽也。日月星辰之期，四時之度，動靜之立，外內之處，天之稽也。高下不蔽其形，美惡不匿其情，地之稽也。君臣不失其位，士不失其處，任能毋過其所長，去私而立公，人之稽也。美惡有名，逆順有形，情偽有實，王公執之以為天下正。

因天時，伐天悔，謂之武。武刃而以文隨其後，則有成功矣，用二文一武者王。其主道，離人理，處狂惑之位處而不悟，身必有戮。柔弱者無罪而幾，不及而趨，是謂柔弱。剛正而強者臨罪而不究。名功相抱，是故長久。名功不相抱，名進實退，是謂失道，其卒必有身咎。黃金珠玉藏積，怨之本也。女樂玩好燔材，亂之基也。守怨之本，養亂之基，雖有聖人，不能為謀。

經法·論

人主者，天地之稽也，號令之所出也，司民之命也。不天天則失其神，不重地則失其根，不順四時之度而民疾。不處外內之位，不應動靜之化，則事窘於內而舉窘於外。八正皆失，與天地離。天天則得其神，重地則得其根。順四時之度而民不有疾。處外內之位，應動靜之化，則事得於內而舉得於外。八正不失，則與天地總矣。

天執一，明三，定二，建八正，行七法，然後施於四極，而四極之中無不聽命矣。蚊行喙息，扇飛蠕動，無不寧其心，而安其性，故而不失其常者，天之一也。天執一以明三，日信出信入，南北有極，度之稽也。月信生信死，進退有長，數之稽也。列星有數，而不失其行，信之稽也。天明三以定二，則壹晦壹明，壹陰壹陽，壹短壹長。天定二以建八正，則四時有度，動靜有立，而外內有處。

天建八正以行七法：明以正者，天之道也；適者，天度也；信者，天之期也；極而反者，天之性也；必者，天之命也；順正者，天之稽也；有常者，天之所以為物命也：此之謂七法。七法各當其名，謂之物。物個合於道者，謂之理。理之所在，謂之順。物有不合於道者，謂之失理。失理之所在，謂之逆。逆順各有命也，則存亡興壞可知也。

強生威，威生惠，惠生正，正生靜。靜則平，平則寧，寧則素，素則精，精則神。至神之極，見知不惑。帝王者，執此道也。是以守天地之極，與天俱見，盡施於四極之中，執六柄以令天下，審三名以為萬事

稽，察逆順以觀於霸王危亡之理，知虛實動靜之所為，達於名實相應，盡知情偽而不惑，然後帝王之道成。

六柄：一曰觀，二曰論，三曰動，四曰專，五曰變，六曰化。觀則知死生之國，論則知存亡興壞之所在，動則能破強興弱，專則不失是非之分，變則伐死養生，化則能明德除害。六柄備則王矣。三名：一曰正名立而偃，二曰倚名法而亂，三曰無名而強主滅：三名察則事有應矣。

動靜不時，種樹失地之宜，則天地之道逆矣。臣不親其主，下不親其上，百族不親其事，則內理逆矣。逆之所在，謂之死國，死國伐之。反此之謂順，順之所在，謂之生國，生國養之。逆順有理，則情偽密矣。實者示人虛，不足者示人有餘。以其有事，起之則天下聽；以其無事，安之則天下靜。名實相應則定，名實不相應則爭。名自命也，物自正也，事之定也。三名察則盡知情偽而不惑矣。有國將昌，當罪先亡。

經法·亡論

凡犯禁絕理，天誅必至。一國而服六危者，滅；一國而服三不辜者，死；廢令者，亡；一國而服三壅者，亡地更君；一國之君而服三凶者，禍反自及也。上溢者死，下溢者刑。德薄而功厚者隳，名禁而不匡者死。抹利，襦傳，達刑，為亂首，為怨媒：此五者，禍皆反自及也。

守國而恃其地險者削，用國而恃其強者弱。興兵失理，所伐不當，天降二殃。逆節不成，是謂得天；逆節果成，天將不盈其命而重其刑。贏極必靜，動舉必正。贏極而不靜，是謂失天；動舉而不正，是謂後命。大殺服民，戮降人，刑無罪，禍皆反自及也。所伐當罪，其福五之；所伐不當，其禍十之。

國受兵而不知固守，下邪恒以地界為私者保。救人而弗能存，反為禍門，是謂危根。聲華實寡，危國亡土。夏起大土功，命曰絕理。犯禁絕理，天誅必至。六危：一曰嫡子父，二曰大臣主，三曰謀臣外其志，四曰聽諸侯之廢置，五曰左右比周以壅塞，六曰父兄黨以拂。六危不勝，

禍及於身。三不辜：一曰妄殺賢，二曰殺服民，三曰刑無罪：此三不辜。

三壅：內位勝謂之塞，外位勝謂之拂；外內皆勝則君孤直。以此有國，守不固，戰不克。此謂一壅。從中令外謂之惑，從外令中謂之賊。外內遂爭，則危都國：此謂二壅。一人擅主，命曰蔽光。從中外周，此謂重壅。外內為一，國乃更。此謂三壅。三凶：一曰好凶器，二曰行逆德，三曰縱心欲：此謂三凶。

昧天下之利，受天下之患；昧一國之利者，受一國之禍。約而背之，謂之襦傳。伐當罪，見利而反，謂之達刑。上殺父兄，下走子弟，謂之亂首。外約不信，謂之怨媒。有國將亡，當罪復昌。

經法·論約

始於文而卒於武，天地之道也；四時有度，天地之理也；日月星辰有數，天地之紀也。三時成功，一時刑殺，天地之道也；四時而定，不爽不忒，常有法式，天地之理也；一立一廢，一生一殺，四時代正，終而復始，人事之理也。

逆順是守，功溢於天，故有死刑。功不及天，退而無名；功合於天，名乃大成。人事之理也。順則生，理則成，逆則死，失則無名。背天之道，國乃無主。無主之國，逆順相攻。伐本隳功，亂生國亡。為若得天、亡地、更君；不循天常，不節民力，周遷而無功。養死伐生，命曰逆成。不有人戮，必有天刑。逆節始生，慎毋戡正，彼且自抵其刑。

故執道者之觀於天下也，必審觀事之所始起，審其形名。形名已定，逆順有位，死生有分，存亡興壞有處，然後參之於天地之恒道，乃定禍福死生存亡興壞之所在。是故萬舉不失理，論天下無遺策。故能立天子，置三公，而天下化之：之謂有道。

道者，神明之原也。神明者，處於度之內而見於度之外者也。處於度之內者，不言而信；見於度之外者，言而不可易也。處於度之內者，靜而不可移也；見於度之外者，動而不可化也。靜而不移，動而不化，故曰神。神明者，見知之稽也。

有物始生，建於地而溢於天，莫見其形，大盈終天地之間而莫知其名。莫能見知，故有逆成；物乃下生，故有逆刑，禍及其身。養其所以死，伐其所以生。伐其本而離其親，伐其與而敗其根。後必亂而卒於無名。如燔如倖，事之反也；如遙如驕，生之反也。凡物群財，超長非恒者，其死必應之。三者皆動於度之外，而欲成功者也，功必不成，禍必反自及也。以剛為柔者活，以柔為剛者伐。重柔者吉，重剛者滅。諾者言之符也，已者言之絕也。已諾不信，則知大惑矣。已諾必信，則處於度之內也。

天下有事，必審其名。名理者，循名究理之所之，是必為福，非必為災。是非有分，以法斷之；虛靜謹聽，以法為符。審察名理終始，是謂究理。唯公無私，見知不惑，乃知奮起。故執道者之觀於天下也，見正道循理，能與曲直，能與終始。故能循名究理。形名出聲，聲實調和。禍災廢立，如影之隨形，如響之隨聲，如衡之不藏重與輕。故唯執道者能虛靜公正，乃見正道，乃得名理之誠。

亂積於內而稱失於外者伐，亡形成於內而舉失於外者滅，逆則上溢而不知止者亡。國舉襲虛，其事若不成，是謂得天；其若果成，身必無名。重逆以荒，守道是行，國危有殃。兩逆相攻，交相為殃，國皆危亡。

昔者黃宗，質始好信，作自為象，方四面，傳一心，四達自中，前參後參，左參右參，踐位履參，是以能為天下宗。吾受命於天，定位於地，成名於人。唯余一人德乃配天，乃立王、三公，立國置君、三卿。數日、曆月、計歲，以當日月之行。吾允地廣裕，類天大明。

吾畏天、愛地、親民，立無命，執虛信。吾愛民而民不亡，吾愛地而地不荒，吾受民而民不死。吾位不失。吾苟能親親而興賢，吾不遺亦至矣。

黃帝令力黑浸行伏匿，周流四國，以觀無恒，善之法則，力黑視象，見黑則黑，見白則白。地之所德則善，天之所刑則惡。人視則鏡：人靜則靜，人作則作。力黑已布制建極，而正之。力黑曰：天地已成而民生，逆順無紀，德虐之刑，靜作之時，先後之名，以為天下正。因而勒之，為之若何？

黃帝曰：群群□□，窈窈冥冥，為一困。無晦無明，未有陰陽。陰陽未定，吾未有以名。今始判為兩，分為陰陽，離為四時，剛柔相成，萬物乃生，德虐之行，因以為常。其明者以為法，而微道是行。行法循道，是為牝牡。牝牡相求，會剛與柔。柔剛相成，牝牡若形。下會於地，上會於天。得天之微，若時者時而恒者恒，地因而養之；恃地氣之發也，乃夢者夢而茲者茲，天因而成之。弗因則不成，弗養則不生。夫民之生也，規規生食與繼。不會不繼，無與守地；不食不人，無與守天。

是故羸陰布德，重陽長，晝氣開民功者，所以食之也；宿陽脩刑，童陰長，夜氣閉地繩者，所以繼之也。不靡不黑，而正之以刑與德。春夏為德，秋冬為刑。先得後刑以養生。姓生已定，而敵者生爭，不諶不定。凡諶之極，在刑與德。刑德皇皇，日月相望，以明其當，而盈屈無匡。

夫是故使民毋人執，舉事毋陽察，力地無陰敝。陰敝者土荒，陽察者奪光，人執者撓兵。是故為人主者，時適三樂，毋亂民功，毋逆天時。然則五穀溜熟，民乃蕃滋。君臣上下，交得其志。天因而成之。夫并時以養民功，先德後刑，順於天。其時贏而事屈，陰節復次，地尤復收。正名修刑，蟄蟲不出，雪霜復清，孟穀乃蕭，此災乃生，如此者舉事將不成。其時屈而事贏，陽節復次，地尤不收。正名施刑，蟄蟲發聲，草苴復榮，已陽而又陽，重時而無光，如此者舉事將不行。

天道已既，地物乃備。散流鄉成，聖人之事。聖人不巧，時反是守。優未愛民，與天同道。聖人正以待之，靜以須人。不達天刑，不襦不傳。當天時，與之皆斷；當斷不斷，反受其亂。

十大經・五正

黃帝問閼冉曰：吾欲布施五正，焉止焉始？對曰：始在於身，中有正度，後及外人。外內交接，乃正於事之所成。黃帝曰：吾既正既靜，吾國家愈不定。若何？對曰：后中實而外正，何患不定？左執規，右執矩，何患天下？男女畢迴，何患於國？五正既布，以司五明。左右執規，以待逆兵。

黃帝曰：吾身未自知，若何？對曰：后身未自知，乃深伏於淵，以求內刑。內刑已得，后乃自知屈其身。黃帝曰：吾欲屈吾身，屈吾身若何？對曰：道同者，其事同；道異者，其事異。今天下大爭，時至矣，后能慎勿爭乎？黃帝曰：勿爭若何？對曰：怒者血氣也，爭者脂膚也。怒若不發，浸廩是為癰疽。后能去四者，枯骨何能爭矣。黃帝於是辭其國大夫，上於博望之山，談臥三年以自求也。戰哉，閼冉乃上起黃帝曰：可矣。夫作爭者凶，不爭者亦無成功。何不可矣？

黃帝於是出其鏑鉞，奮其戎兵，身提鼓枹，以遇蚩尤，因而擒之。帝箸之盟，盟曰：反義逆時，其刑視蚩尤。反義背宗，其法死亡以窮。

十大經・果童

黃帝問四輔曰：唯余一人，兼有天下。今余欲畜而正之，均而平之，為之若何？果童對曰：不險則不可平，不謹則不可正。觀天於上，視地於下，而稽之男女。夫天有恒幹，地有恒常。合此幹常，是晦有明，有陰有陽。夫地有山有澤，有黑有白，有美有惡。地俗德以靜，而天正名以作。靜作相養，德虐相成。兩若有名，相與則成。陰陽備物，化變乃生。

有任一則重，任百而輕。人有其中，物有其形，因之若成。黃帝曰：夫民仰天而生，恃地而食，以天為父，以地為母。今余欲畜而正之，均而平之，誰適由始？對曰：險若得平，謹若得正，貴賤必謹，貧富有等。前世法之，後世既隕，由果童始。果童於是衣褐而穿，負餅而鬻，營行乞食，周流四國，以示貧賤之極。

十大經・正亂

力黑問於太山之稽曰：蚩尤□□□驕溢陰謀，陰謀□□□□□□□□□高陽，為之若何？太山之稽曰：子勿患也。夫天行正信，日月不處。啟然不怠，以臨天下。民生有極，以欲涅湫即失。豐而為殺，加而為既，予之為害，致而為費，緩而為哀。憂桐而君之，收而為之咎；累而高之，踣而弗救也。將令之死而不得悔。子勿患也。力黑曰：戰數盈六十而高陽未夫。涅湫早服，名曰天佑。天佑而弗戒，天地一也。為之若何？太山之稽曰：子勿言佑，交為之備。吾將因其事，盈其寺，拊其力，而投之殆。子勿言也。上人正一，下人靜之；正以待天，靜以須人。天地立名，萬勿自生，以隨天刑。天刑不償，逆順有類。勿驚勿戒，其逆事乃始。吾將遂是其逆而戮其身，更置六直而合以信。事成勿發，胥備自生。我將觀其往事之卒而朵焉，待其來事之遂而私焉。壹朵壹禾，此天地之奇也。以其民作而自戲也，吾或使之自靡也。

戰盈哉，太山之稽曰：可矣。於是出其鏘鉞，奮其戎兵。黃帝身遇蚩尤，因而擒之。剝其皮革以為干侯，使人射之，多中者賞。其發而建之天，名約蚩尤之旌。充其胃以為鞠，使人執之，多中者賞。腐其骨肉，投之若醢，使天下□之。

上帝以禁。帝曰：毋乏吾禁，毋留吾醢，毋亂吾民，毋絕吾道。乏禁，留醢，亂民，絕道，反義逆時，非而行之，過極失當，擅制更爽，心欲是行，其上帝未先而擅興兵，視蚩尤共工。屈其脊，使甘其俞，慤為地楹。帝曰：謹守吾正名，毋失吾恒刑，以示後人。

十大經・姓爭

高陽問力黑曰：天地已成，黔首乃生。莫循天德，謀相覆傾。吾甚患之，為之若何？力黑對曰：勿憂勿患，天制固然。天地已定，蚊虻畢爭。作爭者凶，不爭亦毋以成功。順天者昌，逆天者亡。毋逆天道，則不失所守。天地已成，黔首乃生。勝生已定，敵者生爭，不諶不定。凡諶之極，在刑與德。

刑德皇皇，日月相望，以明其當。望失其當，環視其殃。天德皇皇，非刑不行；繆繆天刑，非德必傾。刑德相養，逆順若成。刑晦而德明，刑陰而德陽，刑微而德彰。其明者以為法，而微道是行。

明明至微，時反以為幾。天道環周，於人反為之客。爭作得時，天地與之。爭不衰，時靜不靜，國家不定。可作不作，天稽環周，人反為之客。靜作得時，天地與之；靜作失時，天地奪之。

夫天地之道，寒涅燥濕，不能并立。剛柔陰陽，固不兩行。兩相養，時相成。居則有法，動作循名，其事若易成。若夫人事則無常，過極失當，變故易常；德則無有，措刑不當。居則無法，動作爽名，是以戮受其刑。

皇后歷吉凶之常，以辨雌雄之節，乃分禍福之嚮。憲傲驕倨，是謂雄節；委燮恭儉，是謂雌節。夫雄節者，盈之徒也。雌節者，兼之徒也。夫雄節以得，乃不為福；雌節以亡，必將有賞。夫雄節而數得，是謂積殃；凶憂重至，幾於死亡。雌節而數亡，是謂積德，慎戒毋法，大祿將極。

凡彼禍難也，先者恒凶，後者恒吉。先而不凶者，恒備雌節存也。後而不吉者，是恒備雄節存也。先亦不凶，後亦不凶，是恒備雌節存也。先亦吉，後亦不吉，是恒備雄節存也。

凡人好用雄節，是謂妨生。大人則毀，小人則亡。以守不寧，以作事不成。以求不得，以戰不克。厥身不壽，子孫不殖。是謂凶節，是謂散德。凡人好用雌節，是謂承祿。富者則昌，貧者則穀。以守則寧，以作事則成。以求則得，以戰則克。厥身則壽，子孫則殖。是謂吉節，是謂□德。故德積者昌，殃積者亡。觀其所積，乃知禍福之嚮。

兵不刑天，兵不可動；不法地，兵不可措；不法人，兵不可成。參於天地，稽之聖人。人自生之，天地刑之，聖人因而成之。聖人之功，時為之庸，因時秉宜，兵必有成功。聖人不達刑，不襦傳。因天時，與之皆斷；當斷不斷，反受其亂。

天固有奪有予，有祥福至者也而弗受，反隨以殃。三遂絕從，兵無成功。三遂絕從，兵有成功者，不饗其功，環受其殃。國家有幸，當者受殃；國家無幸，有延其命。萋萋陽陽，因民之力，逆天之極，又重有功，其國家以危，社稷以匡，事無成功，慶且不饗其功。此天之道也。

十大經・成法

黃帝問力黑：唯余一人，兼有天下，滑民將生，年辯用知，不可法組，吾恐或用之以亂天下。請問天下有成法可以正民者？力黑曰：然。昔天地既成，正若有名，合若有形。乃以守一名。上淦之天，下施之四海。吾聞天下成法，故曰不多，一言而止。循名復一，民無亂紀。

黃地曰：請問天下猷有一序？力黑曰：然。昔者皇天使馮下道一言而止。五帝用之，以杙天地，以揆四海，以壞下民，以正一世之士。夫是故讒民皆退，賢人咸起，五邪乃逃，年辯乃止，循名復一，民無亂紀。黃帝曰：一者，一而已乎？其亦有長乎？力黑曰：一者，道其本也，胡為而無長？凡有所失，莫能守一。一之解，察於天地；一之理，施於四海。何以知一之至，遠近之稽？夫唯一不失，一以騶化，少以知多。夫達望四海，困極上下，四向相抱，各以其道。夫百言有本，千言有要，萬言有總。萬物之多，皆閱一空。夫非正人也，孰能治此？罷必正人也，乃能操正以正奇，握一以知多，除民之所害，而持民之所宜。抱凡守一，與天地同極，乃可以知天地之禍福。

十大經・三禁

行非恒者，天禁之；爽事，地禁之；失令者，君禁之。三者既修，國家幾矣。地之禁，不墮高，不增下；毋服川，毋逆土；毋逆土功，毋壅民明。

進不氐，立不讓，徑遂凌節，是謂大凶。人道剛柔，剛不足以，柔不足恃。剛強而虎質者丘，康沉而流湏者亡；憲古章物不實者死，專利及削浴以大居者虛。

天道壽壽，播於下土，施於九州。是故王公慎令，民知所由。天有恒日，民自則之。爽則損命，環自服之。天之道也。

諸庫藏兵之國，皆有兵道。世兵道三：有為利者，有為義者，有行忿者。所謂為利者，見生民有飢，國家不暇，上下不當，舉兵而裁之，唯無大利，亦無大害焉。

所謂為義者，伐亂禁暴，起賢廢不肖，所謂義也。義者，眾之所死也。是故以國攻天下，萬乘之主兼希不自此始，鮮能終之；非心之恒也，窮而反矣。

所謂行忿者，心雖忿，不能徒怒，怒必有為也。成功而無以求也，即兼始逆矣，非道也。

道之行也，由不得已。由不得已，則無窮。故丐者，撫者也；禁者，使者也：是以方行不留。

聖人舉事也，合於天地，順於民，祥於鬼神，使民同利，萬夫賴之，所謂義也。身載於前，主上用之，長利國家社稷，世利萬夫百姓。天下名軒執國士於是虛。壹言而利之者，士也；壹言而利國者，國士也。是故君子卑身以從道，知以辯之，強以行之，責道以並世，柔身以待時。王公若知之，國家之幸也。

國大人眾，強國也。若身載於後，主上不用之，則利國家社稷、萬夫百姓。王公而不知之，乃國家之不幸也。故王者不以幸治國，治國固有前道：上知天時，下知地利，中知人事。善陰陽

□□□□□□□□□□□□□□□□，名正者治，名奇者亂。正名不奇，奇名不立。正道不殆，可後可始。乃可小夫，乃可國家。小夫得之以成，國家得之以寧。小國得之以守其野，大國得之以并兼天下。

道有原而無端，用者實，弗用者空。合之而涅於美，循之而有常。古之賢者，道是之行。知此道，地且天，鬼且人。以居軍其軍強，以居國其國昌。古之賢者，道是之行。

十大經・行守

天有恒幹，地有恒常，與民共事，與神同光。驕湫好爭，陰謀不祥，刑於雄節，危於死亡。奪之而無予，其國乃不遂亡。近則將之，遠則行之。逆節萌生，其誰肯當之。天惡高，地惡廣，人惡苛。高而不已，天將闕上；廣而不已，地將絕之；苛而不已，人將殺之。

有人將來，唯目瞻之。言之壹，行之壹，得而勿失。言之采，行之臬，得而勿以。是故言者心之符也，色者心之華也，氣者心之浮也。有一言，無一行，謂之誣。故言寺首，行志卒。直木伐，直人殺。無形無名，先天地生，至今未成。

十大經・順道

黃帝問力黑曰：大庭氏之有天下也，不辨陰陽，不數日月，不志四時，而天開以時，地成以財。其為之若何？力黑曰：大庭之有天下也，安徐正靜，柔節先定。委變恭儉，卑約主柔，常後而不先。體正信以仁，慈惠以愛人，端正勇，弗敢以先人。

中情不流，執一毋求。刑於女節，所生乃柔。故安靜正德，好德不爭。立於不敢，行於不能。戰示不敢，明示不能。守弱節而堅之，胥雄節之窮而因之。若此者其民勞不侵，飢不怠，死不怨。

不曠其眾，不為兵邾，不為亂首，不為怨媒，不陰謀，不擅斷疑，不謀削人之野，不謀劫人之宇。慎案其眾，以隨天地之從。不擅作事，以待逆節所窮。

見地奪力，天逆其時，因而飾之，事環克之。若此者，戰勝不報，取地不反，戰勝於外，福生於內，用力甚少，名聲章名，順之至也。

十大經・名形

欲知得失情，必審名察形。形恒自定，是我愈靜；事恒自施，是我無為。靜翳不動，來自至，去自往。能一乎？能止乎？能毋有己，能自擇而尊理乎？葆也，屯也，其如莫存。萬物群至，我無不能應。我不藏故，不挾陳。嚮者已去，至者乃新。新故不摻，我有所周。

道無始而有應。其未來也，無之；其已來，如之。有物將來，其形先之。建以其形，名以其名。其言謂何？環□傷威，弛欲傷法，無隨傷道。數舉三者，有身弗能保，何國能守？

奇從奇，正從正。奇與正，恒不同廷。凡變之道，非益而損，非進而退：首變者凶。有儀而儀則不過，恃表而望則不惑，案法而治則不亂。聖人不為始，不專己；不豫謀，不棄時；不為得，不辭福。因天之則。失其天者死，欺其主者死，瞿其上者危。心之所欲則志歸之，志之所欲則力歸之。故巢居者察風，穴處者知雨；憂存故也。憂之則□，安之則久；弗能令者弗能有。

帝者臣，名臣，其實師也；王者臣，名臣，其實友也；霸者臣，名臣也，實賓也；危者臣，名臣也，其實庸也；亡者臣，名臣也，其實虜也。自光者人絕之，驕溢人者其生危、其死辱翳。居不犯凶，困不擇時。不受祿者，天子弗臣也；祿泊者，弗與犯難。故以人之自為，不以人之為我也。不仕於盛盈之國，不嫁子於盛盈之家，不友驕倨慢易之人。

聖人不執偃兵，不執用兵；兵者不得已而行。知天之所始，察地之理，聖人麋論天地之紀，廣乎獨見，卓乎獨知，□乎獨□，□乎獨在。天子地方千里，諸侯百里，所以朕合之也。故立天子者，不使諸侯疑焉；立正嫡者，不使庶孽疑焉；立正妻者，不使婢妾疑焉：疑則相傷，雜則相方。

時若可行，亟應勿言；時若未可，涂其門，毋見其端。天制寒暑，地制高下，人制取予。取予當，立為聖王；取予不當，流之死亡。天有環刑，反受其殃。世恒不可擇法而用我，用我不可，是以生禍。有國存，天下弗能亡也；有國將亡，天下弗能存也。時極未至，而隱於德；既得其極，遠其德，淺致以力；既成其功，環復其從，人莫能殆。諸侯不報仇，不修恥，唯義所在。

隱忌妒妹賊妾，如此者，下其等而遠其身；不下其等不遠其身，禍乃將起。內事不和，不得言外；細事不察，不得言大。利不兼，賞不倍；戴角者無上齒。提正名以伐，得所欲而止。實穀不華，至言不飾，至樂不笑。華之屬，必有實，實中必有穀，穀中必有意。天地之道，有左有右，有牝有牡。誥誥作事，毋從我終始。雷以為車，隆隆以為馬。行而行，處而處。因地以為資，因民以為師；弗因無神也。

宮室過度，上帝所惡；為者弗居，唯居必路。減衣衿，薄棺槨，禁也。疾役可發澤，禁也。草叢可淺林，禁也。聚宮室墮高增下，禁也；大水至而可也。毋先天成，毋非時而榮則不果。日為明，月為晦；昏而休，明而起。毋失天極，究數而止。強則令，弱則聽，敵者循繩而爭。行憎而索愛，父弗得子；行侮而索敬，君弗得臣。有宗將興，如伐於川；有宗將壞，如伐於山。貞良而亡，先人餘殃；商闕而枯，先人之連。埤而正者增，高而倚者崩。

山有木，其實屯屯。虎狼為猛可搆，昆弟相居，不能相順。同則不肯，離則不能，傷國之神。神胡不來，胡不來相教順弟兄茲；昆弟之親，尚可易哉。天下有三死：忿不量力，死；嗜欲無窮，死；寡不避眾，死。毋藉賊兵，毋裹盜糧。藉賊兵，裹盜糧；短者長，弱者強；羸縮變化，後將反施。弗同而同，舉而為同；弗異而異，舉而為異；弗為而自成，因而建事。

陽親而陰惡，謂外其膚而內其□。不有內亂，必有外客。膚既為膚，□既為□；內亂不至，外客乃卻。得焉者不受其賜，亡焉者不怨大。夫天有明而不憂民之晦也，百姓闢其戶牖而各取昭焉；天無事焉。地有財而不憂民之貧也，百姓斬木刈薪而各取富焉；地亦無事焉。諸侯有亂，正亂者失其理，亂國反行焉；其時未能也，至其子孫必行焉。故曰：制人而失其理，反制焉。

生人有居，死人有墓。令不得與死者從事。惑而極反，失道不遠。臣有兩位者，其國必危；國若不危，君與存也。失君必危，失君不危者，臣故佐也。子有兩位者，家必亂；家若不亂，親與存也。失親必危，失親

不亂，子故佐也。不用輔佐之助，不聽聖慧之慮，而恃其城郭之固，怙其勇力之禦，是謂身薄；身薄則殆，以守不固，以戰不克。兩虎相爭，駑犬制其餘。

善為國者，太上無刑，其次正法，其下鬥果訟果，太上不鬥不訟不果。夫太上爭於化，其次爭於明，其下救患禍。寒時而獨暑，暑時而獨寒，其生危，以其逆也。敬勝怠，敢勝疑。亡國之禍

[illegible]

故觀治以知亂，觀前以知反。故聖人觀今之曲直，審其名，以稱斷之。積者積而居，胥時而用。觀主樹以知與治，合積化以知時；以明奇正貴賤存亡。

凡論必以陰陽大義。天陽地陰，春陽秋陰，夏陽冬陰，晝陽夜陰。大國陽小國陰，重國陽輕國陰。有事陽而無事陰，伸者陽而屈者陰。主陽臣陰，上陽下陰，男陽女陰，父陽子陰，兄陽弟陰，長陽少陰，貴陽賤陰，達陽窮陰。娶婦生子婦，有喪陰。制人者陽，制於人者陰。客陽主人陰。師陽役陰。言陽默陰。予陽受陰。諸陽者法天，天貴正；過正曰詭，極則常際乃反。諸陰者法地，地德安徐正靜，柔節先定，善予不爭。此地之度而雌之節也。

恒無之初，迴同大虛。虛同為一，恒一而止。濕濕夢夢，未有明悔。神微周盈，精靜不熙。故未有以，萬物莫以。故無有形，大迴無名。天弗能覆，地弗能載。小以成小，大以成大，盈四海之內，又包其外。在陰腐，在陽不焦。一度不變，能適蚊虻。鳥得而飛，魚得而游，獸得而走；萬物得之以生，百事得之以成。人皆以之，莫知其名。人皆用之，莫見其形。

一者，其號也，虛其舍也，無為其素也，和其用也。是故上道高而不可察也，深而不可測也。顯明弗能為名，廣大弗能為形。獨立不偶，萬物莫之能令。天地陰陽，四時日月，星辰雲氣，蚊行虻動，戴根之徒，皆取生，道弗為益少；皆反焉，道弗為益。堅強而不潰，柔弱而不可化。精微之所不能至，稽極之所不能過。

故唯聖人能察無形，能聽無聲。知虛之實，後能大虛；乃通天地之精，通同而無間，周襲而不盈。服此道者，是謂能精。明者固能察極，知人之所不能知，服人之所不能得。是謂察稽知極。聖王用此，天下服。

無好無惡，上用而民不迷惑。上虛下靜而道得其正。信能無欲，可為民命；信無事，則萬物周遍：分之以其分，而萬民不爭；授之以其名，而萬物自定。不為治勸，不為亂解。廣大，弗務及也；深微，弗索得也。夫為一而不化：得道之本，握少以知多；得事之要，操正以正畸。前知太古，後精明。抱道執度，天下可一也。觀之太古，周其所以。索之未無，得之所以。

上德不德 是以有德 下德不失德 是以无德
 上德无爲 而无以爲也 上仁爲之 而无以爲也
 上義爲之 而有以爲也 上禮爲之 而莫之應也 則攘臂而乃之
 故失道而后德 失德而后仁 失仁而后義 失義而后禮
 夫禮者 忠信之泊也 而亂之首也 前識者 道之華也 而愚之首也
 是以大丈夫居其厚 而不居其泊 居其實 不居其華 故去彼取此

昔之得一者 天得一以清 地得一以寧
 神得一以靈 浴得一以盈 侯王得一而以爲天下正
 其致之也 謂天母已清將恐蓮 謂地母已寧將恐發
 謂神母已靈將恐歇 謂谷母已盈將恐渴 謂侯王母已貴以高將恐歟
 故必貴而以賤爲本 必高矣而以下爲基 夫是以侯王自謂孤寡不穀
 此其賤之本與 非也 故至數譽无譽 是故不欲禄禄若玉 硌硌若石

上士聞道 堇能行之 中士聞道 若存若亡
 下士聞道 大笑之 弗笑 不足以爲道
 是以建言有之曰 明道如費 進道如退 夷道如類
 上德如浴 大白如辱 廣德如不足 建德如偷 質真如渝
 大方无禺 大器免成 大音希聲 天象无刑 道褒无名
 夫唯道 善始且善成

反也者 道之動也 弱也者 道之用也

天下之物生於有 有生於无

道生一 一生二 二生三 三生萬物 萬物負陰而抱陽 中氣以爲和

天下之所惡 唯孤寡不穀 而王公以自名也

勿或云之而益 益之而云 故人之所教 夕議而教人

故強良者不得死 我將以爲學父

天下之至柔 馳騁於天下之至堅 无有入於无間

吾是以知无爲之有益也 不言之教 无爲之益 天下希能及之矣

名與身孰亲 身與貨孰多 得與亡孰病 甚愛必大費 多藏必厚亡

故知足不辱 知止不殆 可以長久

大成若缺 其用不敝 大盈若沖 其用不窮

大直如詘 大巧如拙 大贏如絀

趨勝寒 靜勝熱 清靜可以爲天下正

天下有道 卻走馬以糞 天下无道 戎馬生於郊

罪莫大於可欲 禍莫大於不知足 咎莫憯於欲得

故知足之足 恆足矣

不出於戶 以知天下 不規於牖 以知天道 其出也彌遠 其知彌少
是以聖人不行而知 不見而名 弗爲而成

爲學者日益 聞道者日云 云之有云 以至於无爲 无爲而无以爲
取天下也 恆无事 及其有事也 不足以取天下

聖人恆无心 以百姓之心爲心

善者善之 不善者亦善之 德善也

信者信之 不信者亦信之 德信也

聖人之在天下 欲欲焉 爲天下渾心 百姓皆注其耳目焉 聖人皆孩之

出生入死 生之徒十有三 死之徒十有三 而民生生

動皆之死地之十有三 夫何故也 以其生生也

蓋聞善執生者 陵行不辟兕虎 入軍不被甲兵

兕无所觸其角 虎无所斲其爪 兵无所容其刃

夫何故也 以其无死地焉

道生之而德畜之 物刑之而器成之 是以萬物尊道而貴德

道之尊 德之貴也 夫莫之爵 而恆自然也

道生之 畜之 長之 遂之 亭之 毒之 養之 復之

生而弗有也 爲而弗恃也 長而弗宰也 此之謂玄德

天下有始 以爲天下母

既得其母 以知其子 復守其母 沒身不殆

塞其塤 閉其門 終身不堇 啓其塤 齊其事 終身不棘

見小曰明 守柔曰強 用其光 復歸其明 毋遺身殃 是謂襲常

使我介有知 行於大道 唯他是畏

大道甚夷 民甚好解 朝甚除 田甚芜 倉甚虛

服文采 帶利劍 獸飲食 齎財有余 是謂盜竽 非道也哉

善建者不拔 善抱者不脫 子孫以祭祀不絕

脩之身 其德乃真 脩之家 其德有余 脩之鄉 其德乃長

脩之國 其德乃夆 脩之天下 其德乃博

以身觀身 以家觀家 以鄉觀鄉 以國觀國 以天下觀天下

吾何以知天下之然茲 以此

含德之厚者 比於赤子

蜂蜋蟪蛄弗螫 攫鳥猛獸弗搏

骨弱筋柔而握固 未知牝牡之會而媵怒 精之至也

終日號而不噉 和之至也

知和曰常 知常曰明 益生曰祥 心使氣曰強

物壯即老 謂之不道 不道蚤已

知者弗言 言者弗知

塞其塤 閉其門 和其光 同其塵 銖其兌 解其紛 是謂玄同

故不可得而親 亦不可得而疏

不可得而利 亦不可得而害

不可得而貴 亦不可得而賤 故爲天下貴

以正之國 以畸用兵 以无事取天下 吾何以知其然也才

夫天下多忌諱 而民彌貧 民多利器 而國家茲昏

人多知 而何物茲起 法物茲章 而盜賊多有

是以聖人之言曰 我无爲而民自化 我好靜而民自正

我无事而民自富 我欲不欲而民自樸

其正綦綦 其民屯屯 其正察察 其民央央

禍 福之所倚 福 禍之所伏 孰知其極

其无正也 正復爲畸 善復爲妖 人之悉也 其日固久矣

是以方而不割 兼而不刺 直而不繼 光而不眇

治人事天莫若嗇 夫唯嗇 是以蚤服

蚤服是謂重積德 重積德則无不克 无不克則莫知其極

莫知其極可以有國 有國之母可以長久

是謂深根固氏 長生久視之道也

治大國若烹小鮮 以道立天下 其鬼不神

非其鬼不神也 其神不傷人也

非其神不傷人也 聖人亦弗傷也

夫兩不相傷 故德交歸焉

大國者 下流也 天下之牝

天下之交也 牝恆以靜勝牡 爲其靜也 故宜爲下

大國以下小國 則取小國 小國以下大國 則取於大國

故或下以取 或下而取

故大國者 不過欲并畜人 小國者 不過欲入事人

夫皆得其欲 大者宜爲下

道者 萬物之注也 善人之寶也 不善人之所寶也

美言可以市 尊行可以賀人 人之不善也 何棄之有

故立天子 置三卿 雖有共之璧以先四馬 不善坐而進此

古之所以貴此者何也 不謂求以得 有罪以免與 故爲天下貴

爲无爲 事无事 味无味 大小 多少 報怨以德

圖難乎其易也 爲大乎其細也 天下之難作於易 天下之大作於細

是以聖人終不爲大 故能成其大

夫輕諾必寡信 多易必多難 是以聖人猶難之 故終於无難

其安也 易持也 其未兆也 易謀也 其脆也 易破也 其微也 易散也
爲之於其未有也 治之於其未亂也

合抱之木 生於毫末 九成之臺 作於蘊土 百仞之高 始於足下
爲之者敗之 執之者失之

是以聖人無爲也 故無敗也 無執也 故無失也

民之從事也 恆於其成事而敗之

故慎終若始 則無敗事矣

是以聖人欲不欲 而不貴難得之貨 學不學 而復衆人之所過
能輔萬物之自然 而弗敢爲

故曰 爲道者 非以明民也 將以愚之也

民之難治也 以其知也

故以知知國 國之賊也 以不知知國 國之德也

恆知此兩者 亦稽式也 恆知稽式 此謂玄德

玄德深矣 遠矣 與物反矣 乃至大順

江海之所以能爲百谷王者 以其善下之 是以能爲百谷王

是以聖人之欲上民也 必以其言下之

其欲先民也 必以其身後之

故居前而民弗害也 居上而民弗重也 天下樂誰而弗猷也

非以其無爭與 故天下莫能與爭

小國寡民 使十百人之器毋用 使民重死而遠徙
 有車舟无所乘之 有甲兵无所陳之 使民復結繩而用之
 甘其食 美其服 樂其俗 安其居
 鄰國相望 鷄狗之聲相聞 民至老死不相往來

信言不美 美言不信 知者不博 博者不知 善者不多 多者不善
 聖人无積 既以爲人 己俞有 既以予人矣 己俞多
 故天之道 利而不害 人之道 爲而弗爭

天下皆謂我大 大而不宵 夫唯大 故不宵 若宵 細久矣
 我恆有三寶 市而寶之 一曰茲 二曰檢 三曰不敢爲天下先
 夫茲 故能勇 檢 故能廣 不敢爲天下先 故能爲成事長
 今舍其茲且勇 舍其檢且廣 舍其後且先 則必死矣
 夫茲 以戰則勝 以守則固 天將建之 如以茲垣之

善爲士者不武 善戰者不怒 善勝敵者弗與 善用人者爲之下
 是謂不諍之德 是謂用人 是謂肥天 古之極也

用兵有言曰 吾不敢爲主而爲客 吾不進寸而退尺
 是謂行无行 攘无臂 執无兵 乃无敵矣
 禍莫大於无敵 无敵近亡吾寶矣 故抗兵相若 則哀者勝矣

吾言甚易知也 甚易行也 而人莫之能知也 而莫之能行也
 言有君 事有宗 夫唯无知也 是以不我知
 知我者希 則我貴矣 是以聖人被褐而裹玉

知不知 尚矣 不知知 病矣
 是以聖人之不病 以其病病 是以不病

民之不畏畏 則大畏將至矣
 毋聞其所居 毋猷其所生 夫唯弗猷 是以不猷
 是以聖人自知而不自見也 自愛而不自貴也 故去彼取此

勇於敢者則殺 勇於不敢者則枯
 此兩者 或利或害 天之所惡 孰知其故
 天之道 不戰而善勝 不言而善應 不召而自來 單而善謀
 天罔怪怪 疏而不失

若民恆且不畏死 奈何以殺懼之也
 若民恆且畏死 則而爲畸者 吾將得而殺之 夫孰敢矣
 若民恆且必畏死 則恆有司殺者
 夫代司殺者殺 是代大匠斲也
 夫代大匠斲者 則希不傷其手矣

人之飢也 以其取食稅之多也 是以飢
 百姓之不治也 以其上有以爲也 是以不治
 民之輕死 以其求生之厚也 是以輕死 夫唯无以生爲者 是賢貴生

人之生也柔弱 其死也骭肋堅強 萬物草木之生也柔脆 其死也枯槁
 故曰 堅強者 死之徒也 柔弱微細 生之徒也
 兵強則不勝 木強則競 強大居下 柔弱微細居上

天下之道 猶張弓者也 高者印之 下者舉之
 有余者云之 不足者益之 故天之道 云有余而益不足
 人之道則不然 云不足而奉有余
 孰能有余而有以取奉於天者乎 唯有道者乎
 是以聖人爲而弗有 成功而弗居 若此其不欲見賢也

天下莫柔弱於水 而攻堅強者 莫之能勝也 以其无以易之也
 水之勝剛 弱之勝強 天下莫弗知也 而莫能行也
 故聖人之言云曰 受國之詢 是謂社稷之王
 受國之不祥 是謂天下之王 正言若反

和大怨 必有余怨 焉可以爲善 是以聖人執左芥 而不責於人
 故有德司芥 无德司斃 夫天道无親 恆與善人

道可道也 非恆道也 名可名也 非恆名也
无名 萬物之始也 有名 萬物之母也
故恆无欲也 以觀其眇 恆有欲也 以觀其所噉
兩者同出 異名同謂 玄之有玄 衆眇之門

天下皆知美爲美 惡已 皆知善 斯不善矣
有无之相生也 難易之相成也
長短之相刑也 高下之相盈也
音聲之相和也 先後之相隨也 恆也
是以聖人居无爲之事 行不言之教
萬物昔而弗始也 爲而弗侍也 成功而弗居也
夫唯弗居 是以弗去

不上賢 使民不爭 不貴難得之貨 使民不爲盜 不見可欲 使民不亂
是以聖人之治也 虛其心 實其腹 弱其志 强其骨
恆使民无知无欲也 使夫知不敢 弗爲而已 則无不治矣

道沖而用之有弗盈 淵呵 似萬物之宗
銖其兌 解其紛 和其光 同其塵 湛呵 似或存
吾不知其誰之子也 象帝之先

天地不仁 以萬物爲芻狗 聖人不仁 以百姓爲芻狗

天地之間 其猶橐籥與 虛而不瀦 動之而俞出

多聞數窮 不若守於中

浴神不死 是謂玄牝 玄牝之門 是謂天地之根

緜緜呵 若存 用之不堇

天地長久 天地之所以能長且久者 以其不自生也 故能長生

是以聖人退其身而身先 外其身而身存 不以其无私與 故能成其私

上善如水 水利萬物而有爭 居衆人之所惡 故幾於道矣

居善地 心善淵 予善天 言善信 正善治 事善能 動善時

夫唯不爭 故无尤

持而盈之 不若其已 揣而兌之 不可長葆之

金玉盈室 莫之能守也 貴富而驕 自遺咎也 功遂身退 天之道也

載營柏抱一 能毋離乎 搏氣至柔 能嬰兒乎

脩除玄監 能毋有疵乎 愛民牯國 能毋以知乎

天門啓闔 能爲雌乎 明白四達 能毋以知乎

生之畜之 生而弗有 長而弗宰也 是謂玄德

卅輻同一轂 當其无 有車之用也

撚埴爲器 當其无 有埴器之用也

鑿戶牖 當其无 有室之用也

故有之以爲利 无之以爲用

五色使人目明 馳騁田獵使人心發狂 難得之貨使人之行彷徨

五味使人之口爽 五音使人之耳聾

是以聖人之治也 爲腹而不爲目 故去彼取此

弄辱若驚 貴大患若身

何謂弄辱若驚 弄之爲下 得之若驚 失之若驚 是謂弄辱若驚

何謂貴大患若身 吾所以有大患者 爲吾有身也 及吾无身 有何患

故貴爲身於爲天下 若可以詭天下矣

愛以身爲天下 如可以寄天下

視之而弗見名之曰微 聽之而弗聞名之曰希 搢之而弗得名之曰夷

三者不可至計 故裙而爲一

一者 其上不謬 其下不忽 尋尋呵 不可名也 復歸於无物

是謂无狀之狀 无物之象 是謂沕望

隨而不見其後 迎而不見其首

執今之道 以御今之有 以知古始 是謂道紀

古之善爲道者 微眇玄達 深不可志 夫唯不可志 故强爲之容
 曰 豫呵 其若冬涉水 猶呵 其若畏四鄰 嚴呵 其若客
 渙呵 其若凌澤 沌呵 其若樸 濬呵 其若濁 滌呵 其若浴
 濁而静之徐清 女以重之徐生
 葆此道不欲盈 夫唯不欲盈 是以能敝而不成

至虛極也 守静督也 萬物旁作 吾以觀其復也
 天物紘紘 各復歸其根 歸根曰静 静是謂復命
 復命常也 知常明也 不知常 芒 芒作 凶
 知常容 容乃公 公乃王 王乃天 天乃道 道乃久 没身不殆

太上 下知有之 其次 親譽之 其次 畏之 其下 母之
 信不足 安有不信 猶呵 其貴言
 成功遂事 而百姓謂我自然

故大道廢 安有仁義 知慧出 安有大僞
 六親不和 安有孝茲 國家悶亂 安有貞臣

絕聖棄知 民利百倍 絕仁棄義 民復孝茲 絕巧棄利 盜賊无有
 此三言者 以爲文未足 故令之有所屬
 見素抱樸 少私而寡欲 絕學无憂

唯與訶 其相去幾何 美與惡 其相去何若

人之所畏 亦不可以不畏人

望呵 其未央哉 衆人配配 若饗於大牢 而春登臺

我泊焉未兆 若嬰兒未咳 纍呵 如无所歸

衆人皆有余 我獨遺 我愚人之心也 憊憊呵

鬻人昭昭 我獨若悶呵 鬻人察察 我獨閔閔呵

沕呵 其若海 望呵 其若无所止

衆人皆有以 我獨頑以鄙 我欲獨異於人 而貴食母

孔德之容 唯道是從 道之物 唯望唯沕

沕呵望呵 中有象呵 望呵沕呵 中有物呵

幼呵冥呵 中有請呵 其請甚真 其中有信

自今及古 其名不去 以順衆父 吾何以知衆父之然也 以此

炊者不立 自視者不章 自見者不明 自伐者无功 自矜者不長

其在道也 曰稊食贅行 物或惡之 故有欲者弗居

曲則全 枉則正 洼則盈 敝則新 少則得 多則惑

是以聖人執一 以爲天下牧

不自視故章 不自見故明 不自伐故有功 弗矜故能長

夫唯不爭 故莫能與之爭 古之所謂曲全者 幾語哉 誠全歸之

希言自然 飄風不終朝 暴雨不終日
孰爲此 天地而弗能久 有況於人乎
故從事而道者同於道 德者同於德 失者同於失
同於德者 道亦德之 同於失者 道亦失之

有物昆成 先天地生 蕭呵謬呵 獨立而不垓 可以爲天地母
吾未知其名也 字之曰道
吾強爲之名曰大 大曰筮 筮曰遠 遠曰反
道大 天大 地大 王亦大 國中有四大 而王居一焉
人法地 地法天 天法道 道法自然

重爲輕根 靜爲趨君
是以君子終日行 不遠其輜重 雖有環官 燕處則昭若
若何萬乘之王 而以身輕於天下
輕則失本 趨則失君

善行者无達迹 善言者无瑕適 善數者不以禱策
善閉者无關籥而不可啓也 善結者无繆約而不可解也
是以聖人恆善懲人 而无棄人 物无棄財 是謂曳明
故善人 善人之師 不善人 善人之資 不貴其師 不愛其資
雖知乎大迷 是謂眇要

知其雄 守其雌 爲天下雞
 爲天下雞 恆德不離 恆德不離 復歸嬰兒
 知其白 守其辱 爲天下浴
 爲天下浴 恆德乃足 恆德乃足 復歸於樸
 知其白 守其黑 爲天下式
 爲天下式 恆德不貲 恆德不貲 復歸於无極
 樸散則爲器 聖人用則爲官長
 夫大制无割

將欲取天下而爲之 吾見其弗得已
 夫天下神器也 非可爲者也
 爲者敗之 執者失之
 故物或行或隨 或熱或寒 或強或矧 或培或墮
 是以聖人去甚 去大 去諸

以道佐人主 不以兵強於天下 其事好還
 師之所居 楚棘生之
 善者果而已矣 毋以取強焉
 果而毋驕 果而毋矜 果而毋伐
 果而毋得已居 是謂果而不強
 物壯而老 是謂之不道 不道蚤已

夫兵者 不祥之器也 物或惡之 故有欲者弗居
 君子居則貴左 用兵則貴右 故兵者非君子之器也
 兵者不祥之器也 不得已而用之 銛瀧爲上
 勿美也 若美之 是樂殺人也
 夫樂殺人 不可以得志於天下矣
 是以吉事上左 喪事上右
 是以偏將軍居左 上將軍居右 言以喪禮居之也
 殺人衆 以悲依立之 戰勝 以喪禮處之

道恆无名 樸唯小 而天下弗敢臣 侯王若能守之 萬物將自賓
 天地相合 以俞甘洛 民莫之令而自均焉
 始制有名 名亦既有 夫以將知止 知止所以不殆
 俾道之在天下也 猶小浴之與江海也

知人者知也 自知者明也 勝人者有力也 自勝者強也
 知足者富也 強行者有志也 不失其所者久也 死不忘者壽也

道淪呵 其可左右也 成功遂事而弗有名也
 萬物歸焉而弗爲主 則恆无欲也 可名於小
 萬物歸焉而弗爲主 可名於大
 是以聖人之能成大也 以其不爲大也 故能成大

執大象 天下往 往而不害 安平太

樂與餌 過格止 故道之出言也 曰淡呵其无味也

視之不足見也 聽之不足聞也 用之不可既也

將欲翕之 必古張之 將欲弱之 必古強之

將欲去之 必古與之 將欲奪之 必古予之 是謂微明

柔弱勝強 魚不可脫於淵 國利器不可以視人

道恆无名 侯王若能守之 萬物將自化

化而欲作 吾將闡之以无名之樸

闡之以无名之樸 夫將不辱 不辱以靜 天地將自正